



Bentiaraq Ottosen
Atassut

UKA 2024/37
3. Oktober 2024

Uunga siunnersuut: Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata allannqortinnera pillugu Inatsisartut inatsisaat (Silap pissusianik pissuteqartumik ajornartorsionerni ajunaarnersuarnullu assingusuni pisuni aallarteqqinnissamut tapiissutisisinnaaneq, akiliutigineqartartut qaffanneri kiisalu qinnuteqarnermi piffissaliussat eqqunneqarneri)

(Aalisarnermut Piniarnermullu Naalakkersuisoq)

Aallarnisaaqqinnissamut periarfissat atuuttut eqqarsaatigineqartillugit inuussutissarsiutigalugu aalisartut, inuussutissarsiutigalugu piniartut aamma nunalerinermi ingerlataqartut imminut pilersornerat toqqammaviliisooqataavoq, inuiaqatigiit akornanni inoqarfinni annerni aamma inoqarfinni minnerni ineriartortitsisumik.

Inuussutissarsiutit suugaluartulluuniit ineriartortinneqarsinnaapput, piumassuseq taana namminermiippoq. Inuk piumaguni ineriartortissinnaavai, allaallumi ineriartorneq ima ajornangitsigisinnaavoq; nuna illorsuaqanngitsoq illorsualiorfigisinnaallugu inerisakkani naamassillugu. Tassa taana anersaaq inuiaqatigiinni imminut pilersornermut aqutissatut toqqarneqartussaq, taamatulli toqqaaniaraanni aqutit ajornanginnersiortariaqarparput. Taamatut aqutissiussinissaq Atassummiit pingaaruteqarluinnartut tikkuarumavarput, siunertamut inuussutissarsiortortatsinnut oqariartuutigisassaq. Suna tamaat aallartiffeqarlunilu – naaffeqanngiusattumik inernilerneqarsinnaasarpoq sinnattut upperigaani piviusunnqortikkusullugillu.

Aningaasarsiorneq eqqartorneqartillugu nammineerluta kiffaangissuseqarpugut ineriartortissinnaasagut ineriartortissallugit, allaallumi aningaasartaqanngitsumik ineriartortitsisinnaavugut aatsaat eqqarsarsinnaagutta, suliassarli timitalernissaanut aqutit ajornangittut atorlugit ingerlasinnaalluta. Siulitta qanga imminut pilersornerat qiviarutsigu, kalaaleq kiffaangissuseqarsimaqaaq – ullorli manna uteqattaarlugu oqaatigiuarsimavarput: Eqqaamaqqara inuk qitiutillugu kiffartuusinnissaq, erseqqissarusuppara inuk kiffaangissuseqarpoq, kiffaanngissusiianeq politikikkut toqqammaviliisuungilaq.

Erseqqissarusuppara pisortanit utaqqiinangikkaluarluni sukkulluuniit inuussutissarsiutip ingerlaanarnissaanut siunertaqartartut inuussutissarsiutigalugu ingerlatsisusut, taakkua namminersorlutik ingerlatsisuupput. Taakkua nersugassaapput, ukioq qanoq ilisukkulluuniit silamik



peqquteqartumik ajornartoornermi namminersorlutik ingerlatsisarnerat pisortanit utaqqinngikkaluarlutik inuussutissarsiutitik ingerlatiinartaraat maanna nersugassaapput. Taakkuummata ineriartornermut malinnaasut, ullullu tamaasa ineriartorusuttut.

Misilittagakinneq misilittagartuneq apeqqutaanngilluinnarput, inuk nammineerluni piomaguni angusinnaasani tamaasa angusinnaavai. Inuiaqatigiit inuussutissarsiuteqartut sukkulluuniit Atassummiit tapersersortuarumavagut – qanoq nalaattaqaraluarpata aqutissiornissai pingaartutut isigiuarumavagut.

Nuannaarutigissavara ukioq kingulleq savaatillit aperujussuarnerata kingunerisaanik ajunaarnersuaqarput, tamatuminnгалu Sermeq Helicopters A/S suleqataalluni ingerlatsinera isumaqarpunga nersugassaasut. Tamakkua eqqarsaatigalugit nammineq napatillutik inuussutissarsiuteqartut namminersortumik ikiorneqarnerat inuiaqatigiinni isiginiartariaqakkatta ilagilluinnarpaat, taakkua tassaapput ataqqinaammik tunisassat.

Una siunnersuut taamatut oqaaseqarfigaarput, aappassaaneernejartigani ataatsimiititaliamut susassaqartumut innersuullugu.